

責備餘談

下

翔



責備餘談卷下

崑山方鵬著

袁安不治贓吏

袁安爲河南尹未嘗以贓罪鞠人常曰凡仕者高則望宰相下則希牧守錮人於聖世安所不忍爲也韓億在中書見諸路摺撫官吏小過輒不懌曰夫仕者大則望公卿次則望侍從其下亦望京朝幕職柰何錮之於聖世耶二公之論不約而同蓋長者之用心也雖然君子之仕也行其義也達其道也覬陟崇階希登要地則庸

人之情耳然必檢身潔己奉公守法庶或得之彼苞苴盛行貪黷無厭者雖法網或漏而清議不容欲遂其進取之私不亦難乎且使臧穢狼藉之人一旦得志能不播惡於衆乎柳公綽不貸臧吏法包孝肅曰吾無所諱惟吏之有臧罪者蓋天下之惡一也若所謂小過則可以略之矣

陸抗飲藥不疑

康子饋藥未達不嘗聖人之心非有疑於季氏也蓋謹疾之道當如是爾而況敵國之人乎羊祜陸抗晉吳之

邊將也抗嘗有疾求藥於祐飲之不疑非所以全身遠
謗之道也祐之私恩小信固足以結抗之心然施之平
交則可施之敵國之人則過矣使聖賢處抗之地必不
與之私交而況輕飲其藥以自試於不測之險乎

范丹畱錢償飯

范丹候姊姊飯之畱錢百文而別姊使人追還丹竟不
受郝子廉一介不取諸人曾過姊家飯密畱五十錢置
席下而去嗟乎一介不取非義非道故也里族朋友之
閒貨財之相通飲食之相召苟無害於道義者斯孔子

受之矣而況於兄弟之懿親乎且以錢償飯市肆之所爲耳今施之於懿親是以市肆待之也何其薄哉何其小哉

邴原重父輕君

魏太子丕與衆賓燕集問曰臣子止藥一丸而君父各有危疾將救父乎抑救君乎衆議紛紜時邴原在坐獨無語太子問焉邴原勃然曰父也太子不復難之夫原之說誤矣君父一也不可先後不容軒輊者也據丕之問而評之君父皆疾剖藥分奉以盡臣子之心固不當

獨獻於君又豈可私厚其父哉充原之說則知有父子而不知有君臣難乎免夫廢倫之弊矣

郭翻認稻弗爭

吳鍾離牧客居永興自墾荒田農事既畢民有冒認者牧卽以稻與之縣令欲繩其民牧爲之請得釋民大慙懼春稻得米六十斛還牧牧不肯受晉郭翻客居臨川先立表題經年無主乃樹藝成熟有誤認者悉推與之縣令聞而詰之以稻還翻翻不肯受夫開荒治穢迄於西成勞亦甚矣其民認而是耶吾取三之一以償其費

三石齋集卷一
認而非耶吾與三之一以慰其心則彼我兩得其平而
取予皆合於義矣今皆拒而不受則吾竊廉介之名而
陷其民於冒濫之罪獨何心哉

趙苞棄母存州

甚哉用權之難也非擇之精見之決於倉卒急遽之時
鮮有不失其輕重之倫者矣趙苞存其州而死其母似
不得不然者然以聖賢處之則恐別有其道而不肖若
是其急也前乎此者王陵臣漢而棄其母然於沛公不
加益後乎此者徐庶辭漢而全其母然於昭烈不加損

蓋一子之或去或畱不係乎國之存亡而係乎母之生
死其輕重較然矣若槩以許國爲義徇君爲忠是豈善
用權者哉或曰大義滅親如何曰非苞之謂也衛之石
蜡魯之季友隋之堯君素之謂也是故同一殺子也在
石蜡則宜而易牙爲忍同一殺兄也在季友則正而世
民爲過同一殺妻也在君素則善而吳起爲貪

孔褒一門爭死

甚矣習俗之易以移人也天下愛生而怖死者莫婦人
若也而風聲氣習亦足以移之不亦異乎初張儉之授

止也孔融不告其母不待其兄而自匿之以召家門之禍其死有辭焉喪不必死以養其母可也然猶可言也至於母氏乃欲自當其辜則無謂矣豈非當時好尚如此故雖婦人女子亦能輕生委命而不以爲難耶萬一朝廷竟坐其母則二子將何以立於世而或皆賜之死則亾身及親之罪又何以自解於天下哉

荀晞殺其昆弟

荀晞字道將爲兗州太守從母依之以居奉養甚厚從母子求爲將不許固求之乃以爲督護後犯法晞卽命

斬之從母叩頭申救不聽於是晞有三失焉知其不可用而用之一也旣用之不能戒之以至犯法二也旣犯之不能處之而遽殺之三也晞盍委曲懇到以求其生乎求而不得然後罷官去祿哀請於朝以贖其死請而不得然後不得已而用刑焉則生者死者於我皆無憾矣

懷愍君臣遇害

死等爾死善其道則泰山不足喻其重死非其所則鴻毛不足喻其輕嗚呼可不審哉洛陽初陷懷愍被執正

可死之時也庾珉王雋辛賓諸臣不能奉其國君死於社稷醜顏歸虜辱莫甚焉殆夫青衣行酒戎服執蓋則已失身虜庭矣然後抱帝哀號甘心就戮不亦晚乎夫同一死也死於未降之先則增重綱常流光史冊而萬世瞻仰之死於既降之後則心雖切於愛君事無益於亡國所謂匹夫匹婦之爲諒矣何足道哉文文山曰從懷愍而北者非忠從元帝而南者爲忠蓋亦有見於此耳

王敦收殺周顗

伯仁之死王導固不能無罪矣然亦有以自致也方導率諸族人詣臺謝罪求救於顗時顗未知帝意云何不顧宜也及入見帝稱導忠誠申救甚力帝固已許之矣顗當宣布恩威委曲慰諭以安諸王之心以孤賊敦之黨豈惟保身亦以定亂策之上也奈何屢呼不應導已恨之及顧左右有殺賊奴取金印之語則導安得而不疑之哉夫所謂殺奴取印者謀耶戲耶以謀則疎以戲則虐皆不善處變者也其及也宜矣

鄧攸自棄其子

伯道以弟早亡止有一息寧棄其子以存弟祀意甚善也其子追而及之則已能步矣縱之道路人或憐而收之未可知也繫之於樹絕其生理不仁孰甚焉及其置妾也既不審於媒妁又不卜之鬼神直俟衽席之上始扣其爲甥女而遠之則已噬臍無及矣坐是終身更不畜妾以至絕嗣是又懲噎而廢食也由前言之則不仁由後言之則不智是皆不學之蔽也歟

三公自輕

三公禮絕百僚故其輿服儀衛獨異其數者所以尊老

成隆體貌非特爲觀美也當是任者其可不知自重乎
王戎位總台司嘗乘小馬便門出入見者不知其爲三
公也沈慶之每朝賀常乘犢鼻無幘車履行田園徹屏
侍從遇之者不知其爲三公也達夷武拜太尉行常單
馬門不施戟嘗曰天下未平國恩未報安事威儀乎此
三人者輕率如此知其不足以勝是任矣如其道則後
車數百乘從者數百人不以爲泰而以此爲泰乎

向柳自恃故舊

漢陳涉旣王其故人嘗與傭耕者叩宮門求見閹吏不

有爲通會勝出遮道而呼勝乃載歸後宮發舒自恣言
勝故情勝怒殺之宋向柳與顏峻友善及峻貴柳猶貧
素不推讓之或戒之曰名位不同禮數亦異卿何更作
曩時態耶柳曰我與士遜心期久不可一旦以勢利處
之及柳以事繫獄屢請於峻峻不救柳遂伏法夫富貴
者固當念故舊而勿遺貧賤者不可恃故舊而自肆但
各盡其道可也然恆人之情旣富貴則忘其久要尙困
窮則過於責望宜乎柄鑿之不合矣然則何處而當也
彼欲見我耶固不可拒亦不可數也固不可諂亦不可

狎也彼或忘我耶則謝絕之而已

王式制出母服

淮南王式繼母初嫁前夫已死改嫁式父已而式父又死旣終喪遂辭式去依其前夫之子以居及其死也祔葬於前夫之墓夫式非其所生而前夫之子實自己出故去此而就彼婦人之情然也但母子之恩不可離而前夫之義則已絕養之可也葬之不可也前夫之子於是乎非禮矣式之於繼母也生不能養死不能葬乃爲制出母服其如禮何哉且母終喪而去非得罪於式父